

許偉君修鴻溝陂而太守爲立廟圖形苟利在一鄉
義切桑梓公也非私也况于蘋蘩蘊藻以報嘉德人
實有心其能已乎楊君諱慎成爲承天太守桃溪公
子幼而穎達佐其父如老吏旣長有聲膠序輒冠一
軍蓋尚節俠而好行其惠者余昔備兵此上土人爲
余道其行誼不衰云

重修石固寨記

薛所蘊

禮部
侍郎

有利焉爲民畫之有患焉爲民防之已難其人况畫
利必於其利之長防患必於其患之萌如我憲副沈

公澤浹窮簷心存保障經畫遠猷俾世世子孫嘉賴
無窮者不更難歟攷許葛西偏舊有石固寨當日經
營創始係生員楊慎成而解橐出資以勦厥成者則
生員王玉璣也嗣後立戈爲祟石鼓妄鳴逆寇橫潰
蛇豕長驅中原重地盡爲灰燼尙有於區區石固且
萑苻嘯聚在在蜂起維時幸有別駕尹君諱奇選者
倡率守禦日夜戎服登陴捍衛遐邇居民頗依以爲
樂土全活者幾千家迨

皇清定鼎撫流招移輯寧村鎮寨內鱗集碁布耆婦子

室廬一如舊日則信乎其爲善地也第承平日久屏
翳叢雜池隍堙塞無復有過而問之者沈公以編修
外擢備兵禹州經臨其地見士民絡繹販負雜投爭
於此謀卽次之安公顧而樂之以爲此芸芸者庶幾
有殷繁之象然猶懼其不虞民終散也遂進父老而
諭之曰廢垣不葺如保甲何余非樂爲興役以罷我
民亦曰有基勿壞有墜必舉繫維爾百姓是賴一時
父老子弟咸荷畚鍤從事亦若有不督而趨不戒而
奮者經始於辛丑初秋訖工於嘉平之望財罔民損

役罔農妨而已翼如煥如屹屹有金湯之固噫神矣
豈公之爲國爲民有以素孚於民使然耶抑百姓知
公之寧我婦子罔敢憚勞雖慳且玩者有所不忍負
耶不然何卜云其吉卽遙觀成而保障永賴也闔塞
士民慨焉念公之明德遠也不憚遠涉徵文於予以
記諸石余用是有感於管子之言矣民惡危墜我存
安之民惡滅絕我生育之沈公有焉雖然公之經文
緯武種種規畫其所創豎以暨修舉流澤於大梁千
里間不一而足何藉此區區片石爲也然此區區者

固石固之士若民所爲歌詠勤苦沐浴至德而不已
於懷者余卽鄙僿不文又烏能已於一言耶公諱荃
字繹堂探花及第前任內翰林國史編修

重修濟衆橋碑記

沈荃

淇河之衝有濟衆橋在長葛城西十五里其始建未
詳目明萬曆十年鄉士李維臣等募修之僅仍舊制
水決復圯四十年邑令王茂才以僉憲李公命重建
規式加廣焉考淇水發源大隗每值秋霖積潦勢若
奔駛至是而湍怒益甚雖甃石成梁然歲月久而土

石嘴自移建距今又四十餘載矣余備兵大梁駐節
陽翟有事汴會輒經臨其地見夫僕馬逡巡蹇行泥
淖更有厲揭而過者因呼里人問之咸曰歷遭水患
之故蓋此地爲南北要衝仕宦商賈以及負戴而行
執殳而驅者趾相錯也此橋頽壞行旅苦之至如城
西之宣化西關孟村張史蔡村等里禾黍室廬屢被
漂沒又許州司土帳地小趙沈村四保地勢窪下蓄
而不洩其罹害尤深及今不修將漸成澤國矣余聞
而傷焉亟捐俸以爲遠近倡一時諸屬吏暨使客士

氓之好義者皆協助有差而葛令劉君濤則督率里
中士民鳩工運石趨事恐後經始于庚申四月之朔
告成于辛丑三月之望規模弘壯悉改舊觀仍建河
神祠于其陽余諏日潔牲親詣祀之里人前而致詞
曰自今以往居者行者胥免墊溺非我公之賜不至
此余謝曰是社稷之靈也河伯之惠也羣有司之贊
厥成而諸父老之勤乃事也余何力之有余竊有願
願居者之永無蕩析焉願行者之永履康莊焉更願
後之蒞茲土者其弗忘斯役先事而舉之及時而修

之俾勝蹟罔墮而衝途永賴焉則衆之濟也雖千萬
禩而未有艾也是則余之志也衆喜請文諸石卽以
捐助姓氏識之碑陰

順治十八年歲次辛丑五月端陽前三日

淇河鵝鸕記

李重素

丁卯春兩月不雨麥未秀民甚爲憂洎三月中浣之
二日我邑侯何明府設義塾于濟衆橋延余友程子
雲客爲西席親送生徒詣館如父兄送子弟禮觀者
欣欣稱贊翌日卽雨間日晴又雨大霑足時有化雨

隨車之頌一雨浹旬廿三日午霽訪程子於館因偕
步橋上望雨後青山翠色欲滴新泉澄徹鑒人眉宇
荇藻搖曳中逼見游鱗往來低徊四顧河柳含烟野
花繞籬榆莢片片飛鋪綠茵之上兼之時風拂拂襲
人衣袂岸上數間茅屋砌連水際祠中幾棒鐘聲響
送橋頭程子顧余曰此佳致亦不減武彞桃源令孟
襄陽至此則詩思當不僅在灞橋風雪中也忽余兩
弟攜僮趨至曰人言河之西灣有異禽一雙隨波上
下幾二日村中士女爭看如堵皆以鴛鴦呼之果否

蓋往觀乎余聞而輾然曰天下事有何奇惟聞所未
聞見所未見者卽爲異若果鴛鴦則亦奇矣爰相偕
沿河邊小徑而西去里餘微倦憇于樹陰下有張氏
一者邀之其家小飲爲壯遊興乘力穿林木隨水曲直
抵龍泉寺西不見度不能再乃枕流以待遣僮遠探
之亦不見問之牧子共道近午尚浴于此斯時不知
何往深悔來遲咨嗟者久之頃而夕陽在山同人促
歸渡小橋仍沿河而返心甚怏怏焉越二日有人自
西來見之于張氏村南約程子不及急往視之

五色皆備光采奪日尾如船舵小干鴨噫嘻鴛鴦也
歟哉蓋鸚鵡也茲鳥也何自而來乎余家世居潁水
之濱從未聞有珍禽奇鳥飛集河渚此鳥也何自而
來乎噫嘻余知之矣昔牛僧孺爲邑尉其地有金沙
灘每鸚鵡立于上僚佐卽入臺省一日僧孺與令宴
有二鸚鵡至遂擢西臺今我公本聖賢心出而致君
澤民愷悌行仁和氣致祥治僅數月而高擢之兆已
預見于此矣此鸚鵡所以來也且鸚鵡神鳥也所至
之處羣邪辟之其居若有勅令然因以得名此又見

正人君子之所臨蒞而百邪潛遁之徵應也亦又有
說其羽毛五采文明之象我公以黼黻皇猷之才聊
試製錦于小邑殷殷以培養人文振拔士風爲先務
延名儒育英才設館治中立校遠鄉較之明道夫子
親正兒童句讀後先一轍一時孤寒之士素欲執經
問業而無從者今不煩束贄請謁之勞擔簦負笈之
苦皆得從容函丈異日有德有造以文章輝治道者
皆我公譽髦之士也茲鴻臚也又安知非以光怪陸
離之象發其端乎竊嘗論之天下之理有召必應有

感斯通如治潁川而鳳來集司大理而鵲來巢歷攷
軼事在在捷若影響蓋禽鳥得氣機之先故以類相
應大較如斯也則此鳥爲我公德化之所召致不信
然哉余因是爲程子曷當深體我公作育人材之至
意殫力敦學大相長之益俾化雨恒潤而文明常新
庶不負付託之重禮遇之隆也夫是以記

九百一十六字

潁河鵲巢賦

程曰鵬

維縉葛兮富嵩麓之陽號名區兮居天中之央風土
高厚兮民俗重乎農桑英賢接踵兮吏治擅其循良

維彼淇水兮盤繞湯湯源出大隗兮宛委洋洋泉湧
地兮會千山之溪澗而澄滄浪流衝道兮停萬國之
車馬而萃冠裳橫石橋兮稱濟衆之津梁列茅屋兮
憇旅客之行裝匪澤之國云水一方人沾其潤地發
其祥晴山夫子慈父德揚績高卓魯政軌龔黃治甫
朞月教養具張爰立義塾在淇之傍生徒延集道廣
膠庠譽髦有造欣入門墻時頌化雨感暨窮鄉歌盈
編戶聲滿康莊忽有靈鳥飛來雙雙時隨波而上下
兮時棲息而翺翔或獨往而獨來兮或相偕而相將

浴迴瀾兮濯湍瀨擷荇藻兮挹芳香蔚雲霞兮集五色
儼鵷路兮迴一行絕緘芥之塵垢兮耀彩鳳之文章
瞻羽毛之豐滿兮望冲舉之軒昂尾如柁兮備作
舟作楫之幹濟居有勅兮承如綸如綵之堂皇逐邪
而食兮堪邁獨擊之神鵲狐媚已遁兮寧畏當道之
豺狼豈若唱蕩行吟于澤畔自是乘風破浪之帆檣
雖有如雲之女不過連袂而徬徨亦多游俠之客祇
爲攜手而徜徉至于田翁漁父亦目駭而興狂所在
樵夫牧豎咸足奔而意忙孰是遇物能名之賞鑒第

屬對景怡情之尋常究所由來從未經乎聞見緣其
形似遂共道乎鴛鴦不有玉堂殿中之人物誰識金
沙灘上之行藏李子博物爲記云詳辨明鴻鵠乃關
謬荒維鴻鵠兮靈而異得氣機之先非無端以戾止
維德化兮感之速幾天人之符致旋至而效彰兆我
公之擢遷兮暫試製錦乎山岷竚看黼黻乎廟廊表
葛邑之文明兮旣茂菁莪與樸棧當邀筐篚與笙簧
維鴻鵠兮樹蔭之馴雉謾誇其召致維鴻鵠兮高岡
之鳴鳳乃媿其光昌欲誌奇蹟兮典借功于斑管矣

無敏才兮句愧乏乎琳琅惟願化雨常濡兮並靈巖
之羽而潤教澤遠流兮同淇河之水而長期見神君
而來靈物瑞氣綿亘乎嵩麓之陽名區而治仙吏芳
聲永播乎天中之央

六百四十八字

詩

九日示兩兒

唐杜甫

令節成吾老他時見汝心浮生看物變為恨與年深長
葛書難得江州涕不禁團團思弟妹行坐白頭吟

繻葛道中

巡梁使華亭沈荃

釋堂共五首

鳴笳出洧水弭節指三亭

此地有三亭岡

堤柳新條碧陂苗細

麥青雪峰凝落日雲雁下長汀望望蓬蒿遍檐帷不忍

停

長葛晚行

沈荃

聯騎衝宵發鳴蛩四野聞蒼林懸片月碧漢澹疎雲
葦風偏細川原路不分南飛悲繞樹烏鵲自成羣

石固晚發

沈 荃

曙色穿林莽征笳逐曉行草蟲啼露急木葉下風輕積
潦傷禾稼空村畏甲兵塞帷問疾苦此際最關情

弔王烈婦李氏 有序

沈 荃

石固王生玉璣雅負物望闖逆掠許昌慕其名
陰以金帛貽之王生懼謀諸婦李氏氏白于大
義令遁河北賊怒率騎破砦購生不得遂擒氏

磔之後賊去生得返故丘優游三徑克保身名
皆氏力也余採風而徵其寔爲詩弔之

壬午屯妖氛中原橫殺氣石固如彈丸逆寇恣狼視聞
有高素人王生富韜秘密移一尺書迫脅將招致哲婦
啟王生吾輩憂大義寧忍汚厥身苟且狎兇類長嘯渡
洪河嶽嶽明正志狂賊恨不從孤闈匝萬騎突入王生
家擒婦碎香醜偉哉闈中秀乃能奮勇智夫君名不毀
殺身良獨易憑弔此潛焉短歌申遙企

題長葛尹烈婦李氏

沈 荃

逆賊躡長葛黃塵壓寒堡烈婦抱幼兒冰心何皎皎倉
卒罹寇氛繫頸馳遠道慟哭天爲昏惟恨死不早賊命
棄兒行骨肉料難保婦言觸兇威須臾塗肝腦烈骨有
餘芬貞志凌蒼昊千載垂芳名鬚眉徒草草

過沈繹堂先生祠賦此喜之

施閏章

孟津南去嶽祠東到處甘棠頌沈公名在山川留俎豆
風流何似石渠中

繹堂先生祠步愚山韻如二三老友重聚也

李來泰

袞衣當日偶居東
落落山川置數公
重入鳳池成故事
尚留遺愛滿天中

沈公祠

王民舉

璇宮南望日華東
內外嘉猷總眷公
試問蒼生霖楫事
斜陽碑影碧流中

沈公祠次愚山先生韻

高層雲

曾侍

章皇璧宿東特教
敷齋首羣公承明
久自歸巖助叔子
碑仍夕照中

葛署夏日卽事三首

邑令米漢雯

捲幔收殘雨披襟納遠風樹深官舍古鳥語訟庭空
僮折葵爲扇賓傳芟作筒炎蒸殊可遣景物固天中

其二

奕奕芳蓀逕陰陰重柳堂繙書容我暇荷鍾勸人忙
處靜宜樗櫟安貧罷慨慷嘯歌君莫訝故態是疎狂

其三

中年歡宴寡每欲惜良時判牒憐朝爽彈碁愛日遲
畏蠅裁密塵便體御織絺近喜熏篋奏清談慰旅思

長葛八景總題

邑令潘蒼鄭惟

太丘祠畔說花封
仙子青池迥自溶
護北窗雲長靄靄
襟南泊楫亦重重
潁濱古治誰儀鳳
雁陣層臺漫學鍾
蕭寺晨驚顛倒夢
羲鞭猶駕萬株松

石梁舊跡和韻

鄭惟

石梁在台處
山中余釋褐
偶以爲別號
及宰長社則郊西有石梁跡焉
因取邑志往韻追和之

壯心題柱曲江邊
賦麗吟枯憶昔年
雲渡漁燈留晚棹
風和流水入繁絃
懸虹靜砥千波月
疊石光清萬井烟
斗轉駘征須溥濟
蒼霞縹緲赤城巔

長社寒食連日雨

鄭惟麟

荒城嫩柳綴蒼旂
冷宦鄉愁濁酒卮
寒倩春光舒瘠壤
食無官俸媿流移
啼鶯濕濺溼河水
孤雁雲拖嵩室祠
辛苦征輸妨雨潦
寧勞臥閣更催詩

濟衆橋訪沈太史勒石處并謁鄭大夫子產高廟

鄭惟麟

出郭乘春春自妍
遙山爲浪柳爲烟
徒慙下吏司岩邑
轉羨王臣濟巨川
草閣鶯花晴日裏
茸汗稚麥好風邊
洎溱遺愛千秋在
似覩刑書罷鑄年

王家園牡丹宴集

石固邨王君標五八句有餘矣
子孫甚繁衍

鄭惟颺

背郭春雲擁野驂
名園勝集陘山南
李嵩眉壽人稱瑞
韓令穠華獨未諧
五彩霞沈籠石寨
九苞鳳起瀉花潭
風流姚魏今仍在
婪尾何妨興暫酣

其二

鄭惟颺

王子好賢髦不倦
花神逢客艷方舒
香風細細糝元屑
舞態重重映綵裾
雲簇丹丘瓊樹密
盤凝白玉藥宮疎
飛觴莫放春歸去
縹緲熙臺卜爾居

其三

鄭惟懿

聞說繁葩擅洛陽
謝庭芝蕙共成行
仙家絳雪流醽醑
天外紅雲絢紫囊
憇此春陰清夜爇
借君仁壽惠風翔
新詩忽作變風看
芍藥遲來作辟王

離長社任謝別十二韻

鄭惟懿

谷口耕何晚
彈冠意久迂
弱流凭汨溟
畏壘似枌榆
瑣尾浮名誤
蕭涼綺柱虛
宿糧懷仲路
遠樹哭臯魚
慘割莪蒿裂
愁牽案牘疎
悠悠嗟坎壈
蹙蹙隘臨坤
輿劇孟義
非乏季心諾
有餘蚡嬰難
共是管鮑復
何如痛定興中

夜情深賦後車已跡彭澤酒未盡子雲書雲月滄河溪
松風瀉鄭墟孤山鶴起處南望正踟躕

輓邢兵憲殉忠

范復粹

山東人
大學士

偶讀殉忠傳知君大義明勤王一旅壯遇難隻身輕碧
血心常在青天恨未平舉家全忠節憑弔淚縱橫

僉憲邢老師署征殉難

張自然

山東
舉人

西風獵獵動危旌介馬千羣慘不鳴何處清人宵坐甲
爲憐廉使日專征孤軍倉卒重圍急一劍從容後世名
試看龍岡血戰地至今春草不能生

弔長葛尹烈婦

睢陽湯

斌

大司空

中州昔死亂千里無完堵大將擁節旄聞風散部伍守
令攜卽降忠孝棄如土而乃深閨人秉義不可侮長葛
尹烈婦抱兒守茅宇倉皇賊騎來驅掠似風雨逼令捨
其兒從之赴汴滸烈婦誓死殉大罵嬰其斧數載天兵
臨妖氛不復覩安知非義魂助我王師武孤兒才且賢
文章重詞府誦詩廢蓼莪泣血永懷苦投我沈公篇悲
風滿庭廡我母同節烈讀之心欲腐

陳仲弓祠

賈開宗

高踪推漢代今有仲弓祠烏雀喧荒壠牛羊踏斷碑
人悲殄瘁遺像肅威儀寂寞荒園裏風流百世師

看花行贈花隱主人

山陰何嘉頤
亦明

今古名花誰第一洛陽牡丹天下特妙種移植長社西
十畝園開大令室吾家小阮令茲土看花不患地無王
乘風發興渡錢塘怡情何必遊天姥石尤宵怒鐘山麓
長淮白浪高銀屋矗矗奇峰天外青茫茫新柳平川綠
豈意春風太不情催得啼鵲曉夜鳴花王遲我過三更
老眼看花何處明見者爲言真絕少一似采蓮入蓬島

神迷目眩不能歸聽之使我憂心禱薰風忽破碧雲隈
爭傳芍藥露中開今朝不看又已矣莫使天葩掩翠苔
呼朋促騎西郊出遙望深林如點漆暗香幾度逐風來
停驂不覺心魂失穠奪御府瑪瑙紅潔如傅粉何郎白
就中殷素錯爲容金帶四圍真獨立錦帆千艘接天來
艷冶山前馬上迴不信天孫何所織瑤臺一片五雲裁
玉樽款款當筵舉金衣嚦嚦枝頭語一朶奇花四面開
臨風欲別如何去嘆息棲遲年少時只今老大鬢如絲
花開不語花先醉歲歲花開無盡期却羨種花人不老

板輿日涉園林曉整冠再拜問仙翁力睡百歲容顏好
我欲花間眠不得真成好夢長相憶夢來夢去總爲君
牡丹翻恐無顏色回車忽遇封姨妬野日荒荒浮薄暮
乃知勝事不偶然看花信有花神護

牡丹

何嘉頤

夢裏牡丹今日閒驅車力疾看花來春風有信三年約
芳徑無塵十畝栽獨把素光迎碧落不教紫萼媚蒼苔
更煩明月將心寄攜我騷魂帶露回

其二

何嘉頤

衰顏何意復郊行
姚魏花開不勝情
西子湖邊蓮十里
東山馬上妓三更
頻來青鳥疑先至
不住紅螺好自傾
看罷却愁風雨妬
一枝長傍廣寒橫

憶花隱主人

何嘉頤

淵明栽得柴桑菊
嘯傲籬邊縱醺醪
祖龍封却岱宗松
蒼虬偃蓋生悲風
渭川千畝青翠竹
素封好富驕白屋
鼙鼓中原一戰場
茫茫陸海送歌哭
豈期長葛王標五
夢寐柴桑步其武
不種卮茜不陂魚
笑植天葩心獨苦
吟風醉月臥花茵
細肥殷紅朶朶數
只餘皎素比君心

汝是知音我是主一歲澆培十日開奇姿艷質漾樓臺
珊珊仙骨立莓苔入鷄野鶴爲君來嘆我東西白髮身
曾向花間揖主人開樽飲我如澆酒和露釀爲竹葉春
丁卯之歲花開甚籃輿曉夜環三徑百歲仙翁歛玉樓
灌溉猶昔花難盛知是花意爲君芳君去花孤淚交迸
只今見花不見人倚壩那堪歌獨醒肩子俊逸嗣徽音
黃鸝巧喚友于聽復開雅集醉同羣枝頭灼灼酬清興
嗟哉天地一飄蓬嵩高太華峰巒競攜筇何處問蒼生
花兮歸來隱名姓

子產祠

新安呂履恒舉人

故國存遺愛空山一古祠
野外碧天遠林間春日遲
君子能博物諸侯賴有辭
東偏舊屬邑伏臘自當時

陳太丘祠

呂履恒

太丘名教士高義里人知
祠宇留今日衣冠似漢時
草荒荀氏宅苔沒蔡邕碑
寂寞兩楹地猶堪百世師

同家兄文啟武茂才全子游雙泊河

呂履恒

雙泊河濱帶石田霜清木落響
秋烟獨憐鴻雁孤城影

却羨登臨九月天
楚客魚鹽通野市
吳姬庖湏在江舡
漁燈社鼓新來盛
父老猶疑集鳳年

鍾繇臺

呂履恒

魏國已蒿萊
元常有舊臺
年年城市裏
登眺幾人來

弔尹烈婦李氏

郟城謝

擯

孝廉

南河六月荷香吐
箕坐槐陰狎白鷺
飄然有客繻葛來
示我新詩滿細素
感慨悲歌弔者誰
殉節尹母心如訴
憶昔中原狼虎行
十年會見荆棘生
堅城委頓甘臣妾
將軍戰鼓不聞聲
誰知草野紅顏女
舌根凜凜見生平